

粵雅堂叢書

粵雅堂叢書

雙溪集卷第九

眉山蘇籀仲滋

劄子

并議盜賊一首

面對論和戰劄子

臣聞禹抑洪水拔萬世之患高宗伐鬼方三年克之聖王魏乎建事策勳蓋天關隆平之路治人事天命世膺期不得不然也逮夫中古豪傑之主唐文皇之討頡利漢高帝之賂冒頓措置愜當罔非偉績亦各斟酌時宜廟算多得然嚴尤謂之無策未爲通論乃是不知時勢

而已竊惟陛下日昃焦勞江淮梁益累年小康而中原
尚梗強虜堅敵侵掠憑陵日來事勢誠有間矣而未集
也嗚呼洪水尚可治鬼方頡利冒頓之倫有爲者豈難
制哉陛下睿明今之禹高宗也成功何疑夫和愈於戰
天下雖平忘戰則危聖德英猷何特漢唐可比其當戰
也揆江山夷險之勢持重示弱養威待釁然後趨三捷
之利保萬全而奮暫勞永逸貴謀賤戰以節制輯睦之
眾據險乘便決機取勝近日川陝順昌柘皋殄殲醜類
如舉鴻毛夫或驅捕羶穢或致幣穹廬陛下卜之於天

命參之以人事天誘戎酋之衷知難而退翕然更始厭
處中原思歸巢穴陛下此際熟復長慮合天下之耳目
而察之豈無最遠之見聞歷古今之成敗而推之豈無
最長之方略時攻而攻時賂而賂文皇之雪恥非難高
帝之大度何怯不廢兩塗隨事而慎用之戰而非窮武
拏禍豺狼之羣駭而遠遁賂而非偷安目前氈毳之性
藹然馴服深念夫興王要略豈不曰脩政令肅紀綱理
財用洽恩信精士卒練將帥飭守禦七者益加宸心日
新厥猷勵精勤勉虜必望風奪氣凶悖之心不生一意

慕華朝廷聲實有以待之若不獲己以戰則克豈黷於
兵彼旣馴矣以賂則服奚狃于和大雅稱太王待混夷
曰肆不殄厥愍亦不隕厥問混夷駸矣維其喙矣言虜
困劇而卒服也臣竊謂深仁孝悌之感英靈神武之變
化長樂必歸侵地卽復道勝德立息兵措刑何求而不
得何向而不濟耶臣賤遠愚陋不識時機今日鉅論大
議實非敢與區區事君之義冒死越職而言之欽惟睿
明裁擇取進止

務農劄子

臣聞王政之先務農爲本觀周公豳風所陳后稷以來
田畷耜饁斧斯蠶桑重穆滌場元黃績褐想見先王愛
利厚生之敘慨然稼穡艱難小人之咨者思文之粒烝
民底干道矣古之治財者非一孔籠貨算緡運米斂積
甚勤且裕而周公所陳淵源深矣珠玉泉貨寒不可衣
飢不可食有補飢寒而至重者粟帛也二者不充則它
財無益蓋禾不天降非民力不生縑不地湧非民工不
成今陛下帑藏出千租稅每歲祿廩軍賓以百萬計五
年之蓄九年之備殆其可念自昔承平諸路之賦常不

能自給素所仰者東南數十郡今淮南往往爲斥堠之
郊罕復種植賦入惟恃二浙而已吳地海陵之倉天下
莫及稅稻再熟貢縣八蠶方今縑綺之美不下齊魯又
增以鹺鏹籠權之盛夫復何加白丁紅女終身絲穀伍
符尺籍盡力邊疆行陣者無暇播穡南畝者甘心饋餉
二者互相養衛田夫必億兆於甲士犁牛必百倍于戰
馬而後濟矣嗚呼孰與溫飽天下而富強邦國非農也
哉四民之最苦辛三務之最勞劇苟寬裕其生生之業
則士商工及末務者亦不匱矣臣竊惟先聖有敦本興

王之要道田里之安恃賢守令亦不必其躬行阡陌以爲勸課惟科斂正辭惻怛務實使民養生送死無憾人心悅則陰陽和陰陽和而天下平于是風雨時若耕織咸遂殆其庶矣太公言寬民之目曰利之而勿害成之而勿敗生之而勿殺與之而勿奪樂之而勿苦喜之而勿怒夫如是地無遺利家有羨餘縣官豈在加賦侵牟而後足用閭閻困乏則邦本不固矣姑令有司量入爲出出納之間不失欽慎歲計時辦裁抑浮冗累歲均省必致京坻之豐山嶽之儲帶甲百萬陳錫周洽筐實盈

雙溪集卷之四
四
溢民有蓄藏穀縑雖鉅萬不以爲家貲數雖公私咸有
九年之積可也禮義益敦風化益厚矣陛下待遇守令
賞罰以其勤惰於民才否必由民之謗譽誰敢不盡力
哉嘗聞漢人推衍鹽鐵條目之說至數十萬言亦是裨
益邦家之術臣謂習讀詩書敦本而末茂矣儒家仁富
與霸道固異也臣不勝區區越職昧死以聞伏惟聖明
裁擇取進止

時務劄子

恭惟慮休戚之大究時用之宜情有所不堪功有所難

成不曰如之何殆將無以爲今夫崇聖道稽經旨固已
立治本矣意者文昭而武未允志廣而謀未竭天下之
公患也考之往牒惟借漢可以爲諭高祖起布衣器度
遠大非若諸生規規誦詩書也又蕭張佐之濟其不逮
履至危拔至艱莫不曲當故先得秦鹿如約當王項羽
號百萬眾盛怒將攻之當時眾寡相絕詬忿亦人所不
堪子房導之謝咎自解鄼侯諫以湯武誅伸乃爲頑冒
椎鈍忘小惠而得大勇羽莫能測也及其築壇以拜淮
陰乃定東嚮之計併率五侯之銳以討羽懷王君也羽

又弑之然漢義師嘗不得志屢居項氏掌握之中每以
智算折而不屈王陵領兵迓太公而楚拒絕之漢復失
軍於睢水羽遂止太公呂后高祖自此裁一遇楚小捷
京索卽堅壘深塹不復出矣成皋脩武之間惟務逃楚
以親在其軍故然耶君父之讐但分遣淮陰等數將焚
儲奪地高祖未嘗躬與羽角意有在也所以貴智而鄙
力隨何片言而下九江曲逆萬鎰以間亞父厥後四方
歸漢人心翕若羽雖剽悍失援寡助韓彭力攻之遂有
鴻溝之割侯生緩頰而太公等果歸矣時謂高祖天授

非人謀殆不然焉書曰必有忍其乃有濟隱忍之謂也
方西伯居羨里七年閔天以寶貨奇物獻紂而後得釋
故詩稱周之克商成王業曰夙夜基命宥密於緝熙殫
厥心肆其靖之文王之答天命未嘗求之未嘗舍之能
忍宥也能謀密也及其和洽而光明盡其心矣三代聖
王所以肇基王迹必養銳畏天以漸制敵人故集大勳
焉漢垓下成擒太公亟歸君父之讐遂雪漢之籌畫當
矣暗合於詩書也嗚呼朝廷行大道隆名教漢祖所不
及至于隱忍而知天命卑遜而終不屈比方三王與漢

祖皆一致耳然今日所欲未悉諧允如先王者誠文教
有餘師律未甚競也使授鉞非韓彭則虜無所忌銜命
非陳酈侯隨則請求何獲要當精擢將臣慎行人之選
不愛金幣以結五利廟堂計慮彌綸坐以待旦蕭張功
名垂成矣若夫畱意東求天下廉恥必勝之將則黠虜
破膽今世知兵者豈無遺才乎昨者戎心稍馴貪我賜
予不恃戰爭戰之賂之相時而動不可偏徇此漢高取
太公之策閔天出文王之術也執事者宜熟思之

初論經解劄子

臣聞聖經賢傳唐虞三代所遺闕里之業王者樂道尊
儒內自九重化流寰海金華露門咨訪紬繹辟雍東觀
羣能感奮俾天下品類回心向正政孚教洽三代之盛
漢唐之隆及吾祖宗聖功休烈六籍之效著矣鴻惟陛
下生而知之孳孳舜善聽朝之隙橫經疇咨宵旰睿覽
研幾簡編建立太學首善之始崇道辯惑渥恩養士臣
等遭際作興帶經負笈陶沐亨育紳笏周行戢弁就列
跂望睟穆之儀而又昧死輪對軒陛當得言之秋非有
涓塵稱塞右文以謂不足以爲士矣竊聞永平之歲期

門羽林肄習名教貞觀之盛屯營飛騎受書博士臣固
驚下亦知竦慕狂斐僂說不揆其愚昔者仲尼刪定繫
彖筆削問周史聞齊韶而詩書易禮樂春秋各得其所
惟舉要發端不詳其言非不能詳也以爲詳之則隘故
略之使仁智者自求而得逮夫李斯滅學之後出于屋
壁旣非全經兩漢顓門之流白首講貫受授相傳深不
負仲尼之旨虎觀石渠樞衣重席論難紛紜開益後人
多矣唐文皇時初詔顏師古考定章程孔穎達撰定義
疏遂爲天下定論此兩漢魏晉以來千古儒術也夫六

經微言妙用非可易解而遽曉始學必由傳疏近歲兵
火典籍殘缺比日諸州刊印稍備今之諸生所以窮經
捨正義傳注則懵然矣此非一代之所私一家之偏說
一夫之獨智輯合淘汰千載宇宙之公是非也但漢初
儒者各譎譎師習詩書春秋古文初不甚行公穀方熾
左氏廢錮故三代遺典乖戾不合唐人因舊承疑去取
粗當未暇大有發明易數樂律至今不得其傳臣願陛
下特詔名儒學官既蓄聚唐之義疏復錄近世儒臣以
學顯者所著講解申敕州縣委自守貳網羅纂輯刊刻